

DOMENIE VI «VIE PAL AN»

Antifone di jentrade cf. Sal 30,3-4

Viôt di jessi par me, Diu, une crete che mi pare,
parcè che tu tu sês la mê fuarce e il gno ripâr;
par rivuart dal to non tu mi indreçarâs.

Colete

Diu, che tu disis di fermâti vultîr tai cûrs onescj e sclets,
danus la gracie di jessi propit cussì,
par che tu ti indegnis di fâ di nô la tô cjase.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Gjer 17,5-8

Maladet chel ch'al sta fidât tal om; benedet chel ch'al sta fidât tal Signôr.

Dal libri dal profete Gjeremie

Il Signôr al dîs cussì:

«Maladet l'om ch'al sta fidât tal om
e ch'al fâs de cjar la sô fuarce
biel ch'al slontane dal Signôr il so cûr!
Al è tant che un tamarisc inte pustote,
che no si nacuarç cuant che al rive il ben,
ma ch'al vîf framieç de arsetât dal desert,
tune tiere salade là che nol è a stâ nissun.
Benedet l'om ch'al sta fidât tal Signôr
e ch'al è il Signôr la sô sperance!
Al sarà tant che un arbul plantât ad ôr da l'aghe,
ch'al slungje lis sôs lidrîs viers dal riul;
no si nacuarç cuant che al rive il grant cjalt
e lis sôs fueis a restin verdis;
parfin tal an dal sut no si scompon
e nol soste di butâ fûr lis sôs pomis».
Peraule di Diu.

SALM RESPONSORIÂL dal Salm 1

R. Furtunât chel che si fide dal Signôr.

Furtunât l'om che nol va daûr dal consei de int triste,
che no si ferme su la strade dai pecjadôrs
e che te congreghe de int cence sintiment no si sente,
ma te leç dal Signôr si console
e la sô leç di e gnot al rumie. **R.**

Al è come un arbul plantât ad ôr des aghis,
cjamât di pomis te stagjon juste
e lis sôs fueis no colaran par mai;
a laran in puart dutis lis sôs voris. **R.**

No cussì ve, no cussì pe int triste:
a son come il stranc che l'aiar lu sparnice.
Parcè che il Signôr al cognòs ben il troi de int juste,

ma la strade dai triscj e va in ruvine. **R.**

SECONDE LETURE 1 Cor 15,12.16-20

Se Crist nol è resurît, la vuestre fede no vâl nuie.

De prime letare di san Pauli apuestul ai Corints

Fradis, se si predicje che Crist al è resussitât dai muarts, cemût puedial dî cualchidun di vualtris che no esist resurezion dai muarts? Di fat se no esist resurezion dai muarts, nancje Crist nol è resurît; e se Crist nol è resurît, la vuestre fede no vâl nuie e vualtris o sês ancjemò tai vuestris pecjâts. E ancje chei che si son indurmidûts in Crist a son pierdûts. Se nô o vessin sperance in Crist dome par cheste vite, o saressin i plui disgraciâts di ducj i oms.

Ma invezit Crist al è stât resussitât dai muarts, primizie di chei ch'a duarmin.

Peraule di Diu.

CJANT AL VANZELI Mt 11,28

R. Aleluia, aleluia.

Vignît di me, ducj vualtris ch'o sês stracs e masse cjamâts,
e jo us fararai polsâ, al dîs il Signôr.

R. Aleluia.

VANZELI Lc 6,17.20-26

Furtunâts vualtris puars, parcè che il ream di Diu al è vuestri.

Dal vanzeli seont Luche

In chê volte, Gjesù dismantât jù cui Dodis, si fermà suntun plan. E jere une grande schirie di dissepui e une grande fulugne di int vignude di dute la Gjudée, di Gjerusalem e dal oramâr di Tîr e di Sidon.

E Gjesù, alçant i vôi viers dai siei dissepui, ur diseve:

«Furtunâts vualtris puars,

parcè che il ream di Diu al è vuestri.

Furtunâts vualtris che cumò o vês fan,

parcè che o sarês saceâts.

Furtunâts vualtris che cumò o vaîs,

parcè che o ridarês.

Furtunâts vualtris cuant che chei altris us odearan e us butaran di bande, cuant che us svilanaran e a spresearan il vuestri non tant che vergognôs, par colpe dal Fi dal om. Stait contents in chê dî e gjoldêt, parcè che la vuestre ricompense e je di sigûr grande tai cîi. Di fat a fasevin precîs i lôr paris cui profetis.

Ma puars mai vualtris ch'o sês siôrs,

parcè che o vês za vude la vuestre consolazion.

Puars mai vualtris che cumò o sês passûts,

parcè che o varês fan.

Puars mai vualtris che cumò o ridês,

parcè che o sarês avilîts e o vaiarês.

Puars mai vualtris, cuant che ducj i oms a disaran ben di vualtris; di fat a fasevin precîs i lôr paris cui profetis fals».

Peraule dal Signôr.

Su lis ufiertis

Cheste nestre ufierte, Signôr, che nus fasi tornâ monts e gnûfs

e ur siguri un'eternitât furtunade

a di chei ch'a fasin la tô volontât.

Par Crist nestri Signôr.

Antifone a la comunion cf. Sal 77,29-30

Lôr and àn mangjât fin passûts
e Diu al à sodisfate la lôr brame;
la lôr gole no je stade deludude.

Daspò de comunion

Daspò di vênus sostentâts cul pan dal cîl,
danus, Signôr, la gracie
di vê simpri fan des robis che nus sigurin la vere vite.
Par Crist nestri Signôr.